


明

書

三





書

明

(三)

纂 麟 維 傳

明書卷十七

本紀十四

光宗貞皇帝本紀

帝諱常洛。神宗顯皇帝第一子也。母才人王氏。後封恭妃。是爲孝靖皇后。生於萬曆十年八月十一日。當時神宗春秋鼎盛。宮闈肅穆。以元嗣生大喜。詔赦天下。已上加兩宮聖母徽號。覃恩中外者再。聖母乃出宮。儲二十萬金犒京邊軍。上性孝敬寬仁。舉動中禮。每問安起居。多得神宗意。十四年正月。皇第三子生出。皇貴妃鄭氏。鄭氏最愛幸。時儲位未定。臣下不無私憂。會輔臣申時行請冊立。神宗諭以元子嬰弱。宜少待。十五年正月。申時行等再以建儲封王爲請。不報。科臣部臣復有言之者。俱被譴。十八年正月。神宗召見輔臣於毓德宮。論奏良久。輔臣以冊立豫教請。神宗令宣長哥來與先生一見。帝至時。皇三子亦至。輔臣仰視睿容。皆稱賀。神宗曰。此祖宗德澤聖母恩庇所致。輔臣再進諦視。神宗引帝向明正立。輔臣因請早定大計。神宗頷之。十月。內兩京九卿科道官合詞懇請。而輔臣請之益力。神宗詔切責。三輔臣皆引疾。獨王家屏再疏言。欲釋衆疑。莫若大信之蚤全。欲解擾亂。莫若聖志之蚤定。神宗諭以明年春夏。又明年有三皇子並封之旨。首輔王錫爵以召至。密揭言建儲事。皇上前業有旨矣。乞乘此時從中降諭。決於

今春舉行使盛美歸之獨斷。神宗曰：祖宗立嫡不可易也。中宮尙年少，朕欲三皇子併封王，而虛儲位以待嫡。其爲擬諭，錫爵隨言。待嫡之說，臣未前聞。安敢奉詔？昔漢宋母后有養育庶子故事，無已，請令元子母中宮而正儲位。神宗不許。至十一月，乃諭禮部元子先行豫教。具元子出閣禮儀，奏已諭停。尋又諭：二十一年二月，帝出閣講讀，儒臣進說經旨，帝潛心聽受，多見旁通。一日講官焦竑仰叩以維皇上帝降衷於下民，若有恆性大義。帝應聲曰：只天命之謂性是已。講官董其昌請問擇可勞而勞之。帝答曰：此所謂不輕用民力也。侍臣驚喜嘆服。二十六年二月，閣臣共以冠婚請。奉諭：皇長子元氣單弱，少俟時月。後府部科道諸臣各詣文華門上疏，必得命乃退。神宗遣內官報聞。二十九年九月十八日，諭內閣傳示禮部：上冊立冠婚儀註。十月十五日，冊立爲皇太子。四十一年六月，武弁王曰乾上書告姦人孔學等受人指使，將不利於東宮。語涉翊坤宮。通政司具疏上。神宗大震怒，輔臣葉向高密揭言：此姦徒所爲，當靜處之，勿爲所動。動則紛擾。惟速定福王之國之期，以釋天下疑。神宗納之。中外始安。四十三年五月，有男子張差持梃突入東宮，璫輩共執之以聞。詔下法司。或主風癲者，或涉翊坤宮者。科道臣紛紛言：神宗乃因率帝及長孫諸王孫，召見羣臣於宮門外。諭曰：皇太子國家根本，豈有不愛不重？況諸皇孫振振，朕甚喜。外廷何過疑有他也？命決張差并中官等，帝請無株連，以傷天和。且代諭羣臣勿聽流言，爲不忠之臣。使本宮爲不孝之子。神宗大悅。四十八年七月丁酉，神宗崩。帝告於奉先殿，令禮部會翰林院議大喪禮儀，報訃於藩王，申飭閣部文武諸臣靖共率屬，并敕護衛官兵戒嚴。撤天下礦稅，內使發帑金一百萬犒九邊。

遺詔進封皇貴妃鄭氏爲皇后。禮部侍郎孫如游疏爭之。戊戌。頒遺詔。改戎政。兵部尙書黃克纘爲刑部尙書。仍太子太保。以戶部倉場尙書張問達爲都察院左都御史。陞三邊總督張鶴鳴爲兵部左侍郎。湖廣巡撫徐兆魁爲左副都御史。太僕寺少卿蘇茂相爲僉都御史。巡撫浙江。太常寺少卿胡來朝爲僉都御史。巡撫大同。徐可求巡撫四川。俱都察院左僉都御史。起吏科都給事中李瑾爲太常寺少卿。戶科給事中黃運泰爲光祿寺少卿。陞吏部文選司郎中陸卿榮爲太常寺少卿。河南道御史王象恆。山西道御史馮嘉會。俱太僕寺少卿。起吏部文選司王三善爲太常寺少卿。己亥。再發帑金一百萬兩充遼餉。仍給腳價五千兩。不許騷動驛遞。申罪臣撫辯之禁。起山西副使呂純如爲光祿寺少卿。陞戶科都給事中官應震爲太常寺少卿。庚子。文武羣臣軍民耆舊等上箋勸進。不許。辛丑。再箋勸進。仍不允。壬寅。以勸進箋三上。諭文武羣臣軍民耆舊人等曰。皇考大行皇帝上賓。予哀慟悲號。五內摧裂。爾等以宗社基業至重。皇考遺命之嚴。上箋勸進。至於再三。義正辭懇。不得已勉從所請。諭禮部欽天監擇日具儀。祇告天地宗廟社稷。癸卯。王卜石免以貢市至邊。甲辰。諭邊臣共攄謀猷。早奏蕩平。各賜銀幣有差。乙巳。召還駙馬王昺復職。募南京浙江兵至京師。八月朔丙午。卽皇帝位。詔以明年爲泰昌元年。大赦天下。丁未。敵犯石塘路。諭萬厯舊錢使民通行。勿壅滯。以督學御史周師旦言。罷開納生員事例。戊申。諭起建皇極門殿。撤回催權使張樺等還京。陞河道總督工部右侍郎王佐爲工部尙書。南京大理寺卿王永光爲工部左侍郎。江西巡撫包見捷爲吏部左侍郎。鄖陽巡撫陳禹謨爲刑部右侍郎。起兵部侍郎汪應蛟爲南京戶部

尙書湖廣巡撫董漢儒爲工部右侍郎。左通政林學曾爲太常寺卿。尙寶司卿熊尙文爲太常寺少卿。吏科右給事中姚宗文爲太常寺少卿。福建道御史陳于庭爲太僕寺少卿。國子監司業李騰芳爲詹事府少詹事。兼翰林院侍讀學士。掌南京翰林院印。己酉。欽天監奏改造書厯。日年號報可。命吏部右侍郎兼翰林院侍讀學士史繼偕。南京禮部右侍郎沈漼。俱陞禮部尙書。東閣大學士。入閣參預機務。起吏部右侍郎朱國祚爲南京禮部尙書。命截漕運以濟邊餉。庚戌。頒賜各王府銀幣。以福王潞王懿親有加。諭吏部用建言廢棄并礦稅詿誤諸臣。其事關國本者。分別召用。卹錄。起陞南京刑部郎中鄒元標爲大理寺卿。浙江道御史李宗延爲光祿寺少卿。河南道御史馮從吾爲尙寶司卿。湖廣右參議朱一桂爲太僕寺少卿。河南道御史劉光復爲光祿寺寺丞。陞督餉戶部右侍郎李長庚爲左侍郎。陞寧夏巡撫右僉都御史臧爾勸爲戶部右侍郎。起補太僕寺少卿。周曰庠爲太僕寺少卿。大發兵援遼。定三六九日爲常朝之期。福建海寇平。諭聖母加上尊號。祔皇考陵。起陞都給事中鍾羽正爲太僕寺少卿。添註吏部郎中饒伸爲光祿寺少卿。壬子。號神宗陵曰定陵。諭孝端皇后梓宮發引。召起禮部右侍郎兼翰林院學士顧秉謙。與侍郎韓爌。同管纂修玉牒。癸丑。敕分督四鎮防秋。甲寅。起王德完。孟養浩。楊東明。俱太常寺少卿。胡克儉。何喬遠。俱光祿寺少卿。史弼爲太僕寺少卿。以許宏綱爲兵部尙書。協理京營戎政。以漕運戶部左侍郎王紀爲戶部尙書。總督倉場。陞陝西巡撫李起元爲兵部右侍郎。總督三邊軍務兼理糧餉。陞山東巡撫王在晉爲工部右侍郎。總督河道軍務。以太常寺少卿熊尙文爲右僉都御史。巡撫湖廣。以永平兵備

副使袁應泰爲右僉都御史巡撫遼東起左庶子公鼎爲國子監祭酒起雲南道御史李本固爲太僕寺少卿以湖廣副使饒位爲尙寶司卿起右參政李維禎爲南京太常寺卿起吏科給事中程紹爲太常寺少卿釋罪宗充旣於高牆乙卯帝不豫丁巳諭禮部上大行皇帝尊號戊午定御門引奏例己未諭九月初九日冊立東宮以廣西巡撫陳邦瞻爲兵部右侍郎兼右僉都御史總督兩廣以巡撫李養正爲戶部右侍郎兼右僉都御史總督漕運以山西左布政趙彥爲右副都御史巡撫山東庚申黃河清禮部司務孫學詩奏河清賦詔付史館陞太常寺卿張輔之爲南京大理寺卿起洪文衡爲大理寺右少卿起吏部文選司郎中白所知爲太常寺少卿兵部主事王惟儉爲光祿寺卿辛酉上大行皇帝尊諡允給事中王惟曾言召募酌海運起姜應麟爲太僕寺少卿添註壬戌再諭進封皇貴妃鄭氏爲皇后閣臣方從哲等疏爭之得寢加恩在京文武羣臣軍民耆舊人等補六月大選癸亥賜朝鮮國王及其妃錦幣甲子制諭禮部皇妣孝端皇后及聖母溫肅端靖純懿皇貴妃加上尊號命禮部左侍郎兼翰林院侍讀學士何宗彥劉一燝禮部左侍郎兼翰林院學士韓爌爲禮部尙書兼東閣大學士俱入閣預機務定瑞惠桂三王封國惠王漢中瑞王荊州桂王衡州左軍都督僉事鄭養性奏請收進封皇貴妃成命久之乃允乙丑起大學士葉向高於家以南禮部尙書朱國祚爲大學士同召入閣預機務遣刑部大理寺官十五員於天下恤刑以禮部左侍郎孫如游爲禮部尙書兼翰林院學士刑部侍郎何熊祥爲南京都察院右都御史南京操江右副都御史陳道亨爲刑部右侍郎湖廣左布政陳德元爲右副都御史巡撫廣西光祿寺卿

張我續爲右副都御史。巡撫河南。起吏部文選司郎中。張鳳翔爲南京太常寺少卿。湖廣襄陽府知府。馮若愚爲南京光祿寺少卿。改南京戶部尙書。衛一鳳爲南京兵部尙書。尙寶司司丞姚士慎爲光祿寺少卿。詔旌表節孝。丙寅。蠲永順宣大山西等處逋稅。并通灣房租。丁卯。制諭恭靜端懿溫惠元妃郭氏。及昭肅恭和章懿才人王氏。加上尊號。戊辰。召見勳臣內閣部院大臣及吏科河南道於乾清宮。煖閣。諸臣就御榻前問安。論藥。帝命皇長子出見。諸臣奏東宮天姿英偉。社稷之福。帝悅。羣臣退。命設金復道海運督餉官。起雲南道御史鄒德泳爲尙寶司少卿。耿庭柏爲南京太常寺少卿。添註己巳。詔法司速審釋獄囚。諭修郊祀禮儀廢墜。敵犯甘肅。官兵拒卻之。庚午。上孝端皇后尊諡。及孝靖皇太后尊諡。諭封選侍李氏爲皇貴妃。并選侍傅氏封號。辛未。帝疾彌留。壬申。允御史蕭毅中請開荒地以佐屯政。癸酉。以登極翼贊加恩。方從哲等有差。詔以東宮講官夙著勤勞。詔見任在籍者優擢起用。已故者從優卹錄。吏部聽選監生王應遴請修政大統歷法。從之。颶風壞海運。甲戌。再召輔臣方從哲等十三員於乾清宮。諸臣問安畢。帝仍諭冊立皇貴妃。從哲等對以冊儲原卜期宜移近。蚤竣吉典。以慰聖懷。帝因顧皇長子諭曰。卿等輔佐爲堯舜。又語及壽宮。輔臣以定陵對。帝乃自指曰。朕陵也。諸臣言聖壽無疆。何遽及此。帝仍諭要緊者再。賜諸臣銀幣燒割。九月丙子。帝崩。在位一月。壽三十九。乃追存八月朔以後爲泰昌元年。是年十月己未。上尊諡曰崇天契道英睿恭純憲文景武淵仁懿孝貞皇帝。廟號光宗。天啓元年八月壬寅。葬慶陵。史官贊曰。易稱久道化成。傳謂必世後仁。若光宗御極僅三旬。而升遐之日。深山窮谷。莫不悲號。何其化

孚若是之神也。以帝青宮之養德已久。天下歸心。而大寶初登。仁政沛發。捐朽蠹。撤稅使。臺諫振驚。黃髮儀鴻。且虛懷三接。神宗靜攝而後。覩茲盛舉。其孰不仰末承流也。其尤難者。處危疑之間。靜氣平心。以消反側。卒使庭流融洩。世種祥和。所全不已多乎。而猶惓惓遵遺命。封皇貴妃。必鄭戚哀。請而後止。抑何篤厚也。其淪人肌髓。又不在區區注措矣。使帝出震未及。而幹蠱莫施焉。則三旬之聖天子。將與璇題之煙俱冷矣。悲夫。

明書卷十八

本紀十五

熹宗愍皇帝本紀

帝諱由校。光宗第一子也。生於萬曆三十三年乙巳十一月十四日。母選侍王氏。是爲孝和皇太后。神宗以元孫生。詔告天下。書諭宗藩一切恩賚優厚。悉赦諸臣之礦稅誣誤被繫者。一時海內歡聲雷動。四十八年庚申。神宗遺詔。皇長孫宜及時冊立進學。未及行。光宗立。八月。光宗大漸。召諸大臣受顧命。惓惓以輔帝爲堯舜。帝幼岐嶷。有小慧。每念光宗大業未究。雅志繼述。踐祚之初。任老成。搜遺逸。頗稱盛理。泰昌元年秋九月乙亥朔。光宗崩。是日羣臣聞變。入哭臨畢。請見帝於寢門。奉至文華殿行禮。已而還慈慶宮。諭大臣同欽天監司禮內官相光宗山陵。丙子。頒遺詔。丁丑。大臣請選侍李氏移宮。帝諭擇吉行。戊寅。御史王安舜奏劾李可灼進光宗藥誤。帝令奪可灼俸。己卯。給事中楊漣言。選侍李氏宜移宮。即日移仁壽殿。庚辰。卽皇帝位。詔以明年爲天啓元年。大赦天下。壬午。諭尊光宗元妃郭氏才人王氏爲皇后。並議謚。甲申。上神宗尊謚。命戶部設專理新餉官。給關防。丁亥。上孝端皇后孝靖皇后尊謚。允禮臣請開經筵。擇講官。允給互市沙什台吉冠帶。己丑。諭上光宗尊謚。庚寅。詔以萬曆四十八年八月以後爲泰昌元年。並

書命寶源局仍鑄泰昌通寶錢。命設督運餉芻官。給關防。逮繫遼東總兵李如柏自殺。虎酋率衆挾賞。詔加銀四萬兩。癸巳。蘭州黃河清。以原任陝西按察使邢雲路品測修政歷法。江西大水。甲午。廢太監魏進忠兄釗錦衣正千戶。封乳保婦客氏爲奉聖夫人。並官其男侯興國爲錦衣正千戶。丁酉。發帑銀五十萬修慶陵。戊戌。收用淨身男子三千人。遼東總兵賀世賢戰清兵於灰山。庚子。諭戶部。東事未平。加派不能遽免。其災傷地方加意優恤。十月丙午。葬神宗孝端皇后於定陵。孝靖皇后遷祔。賑江北水災。官客氏弟光先爲錦衣正千戶。壬子。遵遺詔加恩東宮講官。丙辰。祔英宗神主。丁巳。賞九邊軍士。己未。祔神宗及孝端皇后於太廟。上光宗諡。允禮臣請選大婚。辛酉。上御經筵。甲子。蠲雲南貢金二千兩。命以後勿徵之民。乙丑。考選科道官程明樞等五十人。丁卯。曦鸞宮災。戊辰。命大臣公舉風力科臣如遼東勘功罪。癸酉。發帑金一百八十萬勞邊。十一月甲戌朔。頒天啓元年大統歷。丙子。上孝元貞皇后孝和皇太后尊諡。丁丑。撤回天津採取銀魚內官。專敕內官選后及妃嬪。甲申。允給事中張其庭奏。免畿輔加派一年。乙酉。上諭大臣不得輕於求去。言官不得任意雌黃。務協恭盡職。以全國體。命撫按官嚴覈驛遞。以蘇民困。戊子。發京營選鋒三千戍石塘路。癸卯。遣官賜尙方劍於遼東經略袁應泰。十二月。命輔臣撰敕獎楊漣奏移宮爲公直。輔臣奏寢之。癸丑。上諭輔臣曰。邊軍勤勞。良可軫念。命戶兵部覈實加賞。庚申。以少詹事徐光啓兼監察御史。管理練兵。丙寅。允巡撫陝西都御史李起元奏。錄宋儒張載十四世孫文運爲奉祀。給冠帶。己巳。上諭羣臣勿得議論淆亂。自今凡大臣進退。取自上裁。小臣去留。一聽部議。忿爭者下廷議治罪。命

立武學於直省郡縣。收勇力技藝之人。其巾服優免與儒學生員同。江西廣信大水。賑之。

天啓元年辛酉。春正月癸酉。命擇日開講。己卯。發帑金五十萬充遼餉。敕九卿科道官各條陳足餉清餉。畫一之務。壬午。詔選淨身男子三千人入宮。庚寅。大清兵破撫順二十餘屯。敕嚴備之。乙未。賜瑞王惠王桂王養贍莊田。丁酉。加冠謁廟。戊戌。復增收淨身男子二百人。辛丑。定知經筵及講讀侍班官。二月癸卯。朔。清兵至香爐山。禦之。殺傷相當。允戶科給事中趙時用屯田策。甲辰。言官請復當朝口奏及召對之典。上從之。丁未。罷漕運總兵。命禮部選淑女以實宮壺。敕工部修葺國子監廟舍。仍命吏禮二部考稽生儒。戊午。清兵攻虎皮驛。尋至大人屯。乙丑。安仁場火。辛未。命嚴禁左道。閏二月癸酉。免肅藩貢馬。己卯。以京師久無雪。春旱。祈禱。命南京預建黃冊庫房。慎重圖籍。辛巳。復遼東科舉。甲午。命科道官各舉所知。丙申。赦建文時兵部尙書齊泰戚屬後裔之在戍所者。戊戌。昭和殿災。庚子。海州廢弁劉光先反。據岫巖。總兵劉光榮討擒之。三月庚戌。援遼兵士道亡。命撫招之。癸丑。清兵至頭目屯。進圍瀋陽。乙卯。清兵破瀋陽。總兵官尤世功賀世賢死之。川浙總兵官陳策等援瀋陽。率兵戰於渾河。死之。上命褒贈有差。庚戌。上諭文武官。凡職任封疆者。其策勵任事。不得諉卸。壬戌。遣官分祭嶽瀆。歷代帝王陵闕里。及徐王等墳。太和山。神。清兵破遼陽。經略都御史袁應泰。御史張銓。兵備副使何廷魁。僉事崔儒秀等死之。西酋杪花陷長安堡。丙寅。命百官舉謀勇出衆之人。丁卯。命纂修神宗實錄。海州等四衛皆陷。庚午。發帑金一百萬充遼餉。夏四月壬申朔。日有食之。癸酉。瀋都城濠。安南遣使貢方物。初。禁發鈔軍情疏報。丁丑。選得祥符生員張

國紀長女爲皇后。行大婚禮。命防海。戊寅。命演火器於都門外。四川妖僧政神作亂。擒之。甲申。命九卿科道公舉邊材。己丑。倭犯福建澎湖。官兵擒斬。敗之於虎井嶼。遁去。丁酉。允廷臣言。練禁旅。戊戌。大婚禮成。己亥。贈卹遼陽死事文武諸臣。官廩有差。并朝鮮陣亡官兵。五月。烏思藏闡教王貢方物。丙午。敕延鎮監市勞。賜寶會卜失兔。阿不害等有差。丁未。黔苗平。宣捷。集廷臣議兵餉緩急。癸丑。嚴禁各官考語用駢麗語。命登州沿海接濟遼左避難官民三萬有奇。辛酉。固原延綏寧夏援遼兵皆潰。上命招撫之。發內帑銀一百萬充遼餉。丁卯。命開光宗實錄史館。己巳。命天下朝覲官順帶兵器交納。六月。辛未。敕撫按官嚴禁有司科斂。分遣御史各處募兵。甲申。敕貴州征苗功。陞廕賞賚有差。丁亥。加宗室及聖裔中式額。秋七月。庚子。優卹援遼死難四川石砭宣撫司秦拱明。給重慶衛地三十頃。辛丑。上神宗昭妃徽號曰宣懿。壬寅。添設遼東各監軍道。癸卯。敕所在官司嚴捕逃兵。陞客氏男爲錦衣指揮僉事。戊申。禁貢船夾帶私貨。卹陣亡兵千七百餘家。壬子。禁違例越奏。免織造新頒袍式三分之一。八月。庚午。贈土木死節諸臣。乙酉。土魯番貢方物。戊子。詔停杭州織造。辛卯。奉祕憲宗及孝貞皇后。升光宗於太廟。癸巳。詔免行刑。壬寅。葬光宗及孝和皇太后於慶陵。丁未。立武選法。甲寅。四川永寧宣撫司宣撫奢崇明叛。殺巡撫徐可求等。遂據重慶。僞號大梁。發兵討之。冬十月。癸巳。增宗貢名數。乙未。江都妖民武悟空伏誅。十一月。乙巳。套會卜失兔等補萬厯四十七年貢馬。賞賚之。丙午。冬至。大祀天於圓丘。丁未。宴安南國陪臣於禮部。十二月。庚午。敕遼瀋死事諸臣。贈廩有差。及定逃竄官罪狀。癸未。安南都統使黎維新遣官補貢。丙戌。敕定陵工功。丙

申台州兵王元民等作亂擒之旌表天下孝義節烈

二年壬戌春正月朝覲大計官吏詔以卓異中咨訪邊材甲辰復諸司註銷法詔守令久任法丁巳清兵破西平堡總兵劉渠祁秉忠等死之經略熊廷弼等逃兵備高邦佐自殺己未禁侈靡壬戌發兵部銀十萬賑山東流移遼民甲子詔選留朝覲官強幹有智略者乙丑京師戒嚴停殿工申保甲法是日成都圍解二月己巳諭科道官有結黨瀆奏者從重典癸酉水西土同知安邦彥叛圍貴州卹河西殉難諸臣戊寅蠲天下帶徵錢糧二年並免直隸加派辛巳詔廣首科貢額貴州報捷恢復綏陽眞義等處辛卯詔選用宿將議款敵丙申議建銃臺於三協三月舉內操御文華殿講讀以爲常辛丑鑄天啓通寶錢詔勳臣出募兵甲辰厲都門盤結法甲寅廷試貢士四百賜文震孟等進士及第出身有差丁巳安會圍黔省敕湖廣雲南廣西調兵合勦發帑金三十萬充餉戊午京師大購捕姦細民多枉累大旱祈雨夏四月天津行屯田法庚午升祔孝端皇后神主於太廟甲戌敕臨洮斬獲功賞賚有差丁丑貴州危急詔速援之允左都御史鄒元標請於三品京堂添註以疏淹滯癸未罷寶和皇店稅五月四川梓潼妖賊白仙臺等就擒乙亥卹先臣方孝孺遺允丙午山東東平蓮妖徐鴻儒反陷鄆城等處命將討之壬子賞效力守禦會哈喇等米布有差己未括直省存庫銀充餉官兵復重慶六月詔諭山東愚民有從賊來歸者赦之己卯發帑金五十萬於遼東築牆辛巳奢僞偽總兵張武等就擒偽丞相何若海等來降壬午皇極門工成秋七月己酉發帑金三十萬蟒緞八百疋撫敵壬子命賑山海二路雨災詔撫集流徙遼民予田產庚申貴

州官兵敗績。癸亥。畿南紅巾賊于志宏反。討之。丙子。命大學士孫承宗巡歷山海諸處兵馬城守。丁丑。武夷妖賊平。甲申。禁百官私交。乙酉。敍四川死難諸臣。九月甲午朔。升光宗及孝和皇后神主於太廟。庚子。詔新增兵照地畝起餉。乙巳。虎酋款邊。乙酉。設河間屯學。乙卯。冊封皇五弟爲信王。詔停刑。冬十月壬申。雲南官兵恢復霑平。乙亥。順義王補貢。敕止之。丁丑。戒有司混徵停減錢糧。辛巳。山東妖賊徐鴻儒就擒。平之。十一月丙申。四川獻俘。告郊廟。戊戌。慶陵工成。庚戌。命以舊甲裏數萬縫緝衣京師貧民。丁巳。以天氣嚴寒。賜榆關督撫道將各貂皮有差。發帑金五萬賑遼民。命朱燮元爲兵部侍郎。督川湖陝西兵救黔。發帑金三十萬充餉。十二月甲子。暹羅國貢方物。丙寅。以宗室慎鋈首登甲第。命選授京職。著爲令。己巳。貴陽圍解。以山東平。諭撫按官存卹孟氏子孫。修復孟廟。甲戌。泰寧福餘朵顏三衛夷人進馬。賞賚有差。辛巳。停各衙門添註官。覈四川文武功罪。廕卹勘議有差。卹廣東死事將士。辛卯。旌表孝順節烈人等。三年癸亥。春正月。禁召募。舉保甲鄉兵法。工部尙書姚思孝奏織造病民。乞復舊制。不允。辛丑。募壯勇。舉屯鳳淮荒田充餉。壬子。貴陽圍解。宣捷。甲寅。易州妖賊侯德等就擒。乙卯。紅夷入澎湖窺銅山等處。禦之。因遣人乞市。二月癸亥。考察京官。乙亥。貴州副總兵劉超大敗安賊於陸廣河。參將秦明屏復破之於乾溝。踏其五寨。戊寅。簡內庫軍器發遼東軍前。及銀十萬。蟒鱗緞虎豹紵絲於遼。備戰賞。番人安把劄貢方物。丁亥。貴州鴨池陸廣兵敗績。三月甲午。廣西南丹州土官莫儁陰黨安酋。其祖母韋氏殺之。詔旌其義。紫荆妖民趙思武聚衆爲亂。推官范紹序討擒之。丁未。申明憲綱。庚戌。禁鈔傳機密軍情。雲南逆賊祿千

鍾犯尋高武定曲靖官兵禦卻之。平夷霑益復補鮮再犯越州。官兵大克之。斬獲甚多。甲寅。銀酋入犯。擊敗之。黃梅民熊宣等作亂。擒之。丁巳。登萊水兵出海。流球國中山王世子尙豐遣使貢琉黃馬匹。戊午。汰各鎮操守千把總官。夏四月辛酉。申飭朝儀。壬戌。盜入元武門廊下。緝獲之。丙寅。諭各督撫選將材。辛未。兩廣總督胡應台進西洋習練火器人。命教肄之。戊寅。以牧地災傷。蠲薊州草場租。庚辰。停三部總理。戊子。貴州大水大捷。獲渠帥宋萬化。僞軍師劉洪祖。斬之。是時朝鮮國李倧篡其君。五月壬辰。順義王遣人貢鞍馬弓矢。甲午。詔選淨身男子一千人。以河決。蠲睢陳租稅二年。辛丑。免南京進鮮。四川永寧大捷。奢崇明父子敗走紅崖。丁未。冊封才人張氏爲裕妃。癸丑。卹山東死難諸臣。六月。詔再選淨身男子一千人。乙亥。光宗實錄及寶訓成。丙子。虜掠白馬關。禦之。御史劉之鳳請罷內操。不許。秋七月。奢寅父子敗走龍場。賜遼東死事諸臣祠額。丙申。遣官旌韓莊王妃董氏及韓王亶堉節孝。甲寅。廢太監王體乾。魏進忠子姪爲錦衣指揮世襲。廷臣爭之。不報。八月辛酉。以納銀助餉。曰遼生附儒學。戊辰。嚴巡方濫舉之禁。獲安酋僞總兵何中蔚獻俘。磔之。九月庚戌。錄四川死難總兵楊愈。副使李維周等後。冬十月辛酉。平遼總兵毛文龍潛師夜復金州及滿浦呂城。錄遼東陣亡武臣後。癸酉。克安賊琬哈羊雀等屯。斬獲甚衆。丁丑。免行刑。辛巳。皇第二子生。蠲湖廣鮮貢。閏十月己亥。宣延綏等處捷。戊申。套虜貢馬。十一月乙酉。敕貴州擣巢解圍功。右都御史朱燮元等廩賚有差。十二月己亥。陝西韓城妖人李毛頭等作亂。討擒之。己酉。毛文龍與清兵大戰於閭王寨。庚戌。補給先臣楊繼盛全葬。甲寅。旌節孝貞烈。